



Sud Bosne i Hercegovine
Суд Босне и Херцеговине

Broj: S1 3 IŽ 048790 24 IŽ
Sarajevo, 07.08.2024.godine

Sud Bosne i Hercegovine u Sarajevu, u apelacionom vijeću sastavljenom od sudija Mirsade Džindo kao predsjednika vijeća, Dinke Bešlagić-Čovrk i Hilme Vučinić, kao članova vijeća, odlučujući o žalbi političke stranke Demokratska fronta-DF, izjavljenoj protiv Odluke Centralne izborne komisije Bosne i Hercegovine broj: 05-1-07-5-1062/24 od 01.08.2024.godine, o utvrđivanju odgovornosti za vođenje preuranjene izborne, u nejavnoj sjednici, održanoj dana 07.08.2024.godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu utvrđena je odgovornost političke stranke Demokratska fronta-DF iz razloga što je pristalica ove stranke Albin Zuhrić nosilac mandata, predsjednik Kantonalnog odbora Demokratske fronte Sarajevo, putem medija vodio preuranjenu izbornu kampanju, pa joj je na osnovu člana 6.7 stav 2. tačka 1. Izbornog zakona BiH i primjenom odredbe člana 19.9 stav (1) tačka 3. i stav (2) Izbornog zakona BiH izrečena novčana kazna u iznosu od 3.000,00 KM.

Protiv navedene odluke žalbu je izjavila politička stranka Demokratska fronta – DF zbog pogrešno utvrđenog činjeničnog stanja i pogreške primjene materijalnog prava. Centralna izborna komisija BiH nije pravilno utvrdila sve činjenice i okolnosti i da nije u potpunosti na pravilan način tumačila član 7.1 Izbornog zakona BiH. Žalba smatra da na sve što je rečeno na konferenciji, a posebno ističe što je rekao Zuhrić, predstavlja informaciju o odlukama koje je donio Kantonalni odbor Demokratske fronte Kantona Sarajevo, kao i zajedničkim odlukama organa tri političke stranke, koje ne podrazumijevaju bilo koji oblik radnji za izbornu kampanju. Nije predstavljen bilo koji kandidat, niti informacije o karakternim osobinama i planovima ili programu kandidata ni programu Demokratske fronte uopšte. Izjave od Albina Zuhrića na navedenoj konferenciji isključivo su najava da će Demokratska fronta imati kandidata za načelnika Opštine Centar, te da će imati politički program za Lokalne izbore 2024. godine. Iznesene poruke predstavljaju kritiku vlasti, odnosno komentarisanje

trenutnog stanja u Bosni i Hercegovini, bez da su upućivane poruke političke prirode s ciljem uticaja na birače i njihovu volju na predstojećim izborima ili promocije Demokratske fronte. U mometu održavanja press konferencije Dennis Gratz nije ispunio Izbornim zakonom propisane uslove da bude kandidat, jer Demokratska fronta kandidatske liste nije predala, pa kao Centralna izborna komisija iste nije ovjerila, isti nisu postojali.

Predlaže da se žalba usvoji i odluka vrati Centralnoj izornoj komisiji BiH na ponovno razmatranje i odlučivanje.

U odgovoru na žalbu Centralna izborna komisija Bosne i Hercegovine (u daljem tekstu CIK BiH) je predložila da se žalba odbije kao neosnovana.

Žalba nije osnovana.

Iz stanja spisa proizlazi da je CIK BiH na 48. sjednici dana 01.08.2024. godine, postupajući po službenoj dužnosti u predmetu kršenja odredbe člana 7.1 Izbornog zakona BiH od strane političke stranke Demokratska fronta-DF, donijela osporenu odluku kojom je izrekla novčanu kaznu u iznosu od 3.000,00 KM političkoj stranci Demokratska fronta-DF, jer je odgovorna što je pristalica ove političke stranke Albin Zuhrić, nosilac mandata, predsjednik Kantonalnog odbora Demokratske fronte Sarajevo, putem medija vodio preuranjenu izbornu kampanju, čime je prekršila pravila ponašanja u izbornom periodu iz člana 7.1 Izbornog zakona BiH.

Žalitelj je blagovremeno dostavio izjašnjenja navodeći da se u konkretnom slučaju ne radi o preuranjenoj kampanji, da se radi o medijskom izvještaju sa press konferencije koja je održana neposredno nakon održavanja zajedničkog sastanka predstavnika kantonalnih organizacija tri političke stranke, među kojima je učestvovao Albin Zuhrić, predsjednik Kantonalnog odbora Demokratske fronte Kantona Sarajevo. Press konferencija je isključivo vezana za informisanje javnosti o odlukama koje su donijeli organi političke stranke, te da kao takva ne može biti okarakterisana kao „predstavljanje kandidata i programa“. Većina informacija je praktično bila potvrda ranijih informacija koje su mediji objavljivali samostalno, pa ne može predstavljati bilo koji oblik kampanje.

Pravilan je zaključak CIK BiH da je došlo do kršenja odredbe člana 7.1 Izbornog zakona BiH jer iz dokaza koji se nalaze u spisu, jasno proizlazi da je politička stranka Demokratska fronta – DF odgovorna što je putem društvene medija, video zapis press konferencije objavljen na klicks.ba portalu, vodila izbornu kampanju u periodu preuranjene izborne kampanje.

Odredbom člana 7.1 Izbornog zakona BiH propisano je da je u periodu preuranjene izborne kampanje zabranjeno vođenje izborne kampanje u elektronskim, online i štampanim medijima i putem društvenih mreža ili bilo koji oblik javnog oglašavanja kampanje. Ova zabrana ne odnosi se na organizovanje zakonitih zvaničnih skupova organa i događaja političkih subjekata u svrhe koje nisu

kampanja.

U članu 1.1a stav 1. tačka 8. Izbornog zakona BiH, propisano je da je „Preuranjena kampanja“ svaki oblik radnji iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje.

Odredbom člana 9. stav 1. Pravilnika o medijskom predstavljanju i javnom oglašavanju političkih subjekata u izbornom periodu („Službeni glasnik BiH“, broj 31/24) propisano je da je u periodu preuranjene kampanje političkim subjektima zabranjen svaki oblik radnje iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje. Stavom 2. istog člana propisano je da se zabrana iz stava 1. ovog člana odnosi na upoznavanje birača i javnosti sa programom i kandidatima političkih subjekata za predstojeće izbore.

Nije osnovana tvrdnja žalitelja da Centralna izborna komisija nije pravilno i potpuno utvrdila sve činjenice jer iz dijela govora Albina Zuhrića na press konferenciji objavljenoj na klixs.ba portalu izjavljuje:“ kada jedno za jedno četiri ili pet mjeseci Srđan Mandić prestane biti načelnik u Centru da li će se itko od građana sjećati i jednog njegovog poteza poslije toga? Ostavština tog čovjeka je takva i dovoljno govori o njegovom radu i to je razlog zašto.... hoćemo neke nove ljude na tim pozicijama.Mi ćemo imati svog kandidata i to će biti g. Dennis Gratz u Opštini Centar. Mi ćemo pokazati zašto je on kvalitetniji kandidat, pa onda će građani odlučiti da li su za ostanak ovakvih načelnika ili su za neke nove ljude koji će raditi taj posao bolje“.

Iz navedenog teksta proizilazi nesporna činjenica da objave u svom opisu i sadržaju pokazuju promociju programa ove političke stranke za predstojeće Lokalne izbore 2024. godine, sa ciljem upoznavanja javnosti i birača sa programom navedene političke stranke, a može se shvatiti i kao predstavljanje kandidata.

Dakle iz provedenih dokaza jasno proizilazi da je Albin Zuhrić , nosilac mandata i predsjednik Kantonalnog odbora Demokratske fronte -DF postupao suprotno odredbama člana 7.1 Izbornog zakona BiH, za što je odgovorna politička stranka Demokratska fronta -DF, čiji je on pristalica u skladu sa odredbom člana 19.9 stav 2. Izbornog zakona BiH, dakle u periodu prije zvaničnog početka izborne kampanje i koja ima sve elemente kampanje. S obzirom da nije utvrđena lična odgovornost kandidata, to nije od značaja činjenica da u momentu podnošenja podneska Centralna izborna komisija nije ovjerila kandidate za učestvovanje na Lokalnim izborima 2024. godine.

Dakle iz provedenih dokaza jasno proizilazi da je politička stranka Demokratska fronta – DF postupila suprotno odredbama člana 7.1 Izbornog zakona BiH, što je u skladu sa odredbom člana 19.9 stav 2. Izbornog zakona BiH.

Stoga je prema shvatanju vijeća Apelacionog odijeljenja Suda BiH pobijana odluka CIK BiH pravilna i zakonita, jer se radi o nedozvoljenoj radnji u smislu člana 19.9 stav 1. tačka 3. i stav 2. Izbornog zakona BiH odnosno da se radi o promociji političke stranke prije zvanične izborne kampanje.

Pravilno je izrečena i visina novčane kazne zbog vođenja preuranjene kampanje u minimalnom iznosu.

Iz svih izloženih razloga ovo vijeće je osporenu odluku, ocijenilo u potpunosti pravilnom i zakonitom, slijedom čega je žalbu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

PREDSJEDNIK VIJEĆA
S U D I J A

Mirsada Džindo